



PATNUBAY SA MISA

17 Oktubre 2021

Ika-29 na Linggo sa Karaniwang Panahon

Taon B

LINGGO NG KULTURA

ISINILANG UPANG MAGLINGKOD AT MAGBIGAY-BUHAY

Narito ang mga kaibahan ng pagpapakahulugan sa salitang Mesiyas bilang “Hinirang.” Karamihan sa mga Judyo ay nag-isip na isang makapang-yarihang pinuno ang Mesiyas na magpapalaya sa Bayang Israel mula sa pagkakasakop. Sa isip naman ng ilang Judyo, ang Mesiyas ay nanatiling isang Tagapagligtas na aako sa kanilang pagkaalipin maging ng buong sangkatauhan. Iyan ang Mesiyas na inilalarawan sa mga madamdaming eksena sa apat na mga pagbasa mula sa Aklat ni Isaias na kilala sa tawag na “Ang mga Awit ng Alipin ng Panginoon.”

Ang kaluwalhatian at tagumpay ay kasama sa ikaapat na Awit ngunit sa wakas lamang matatamo, pagkatapos pa ng kanyang malupit na pagdurusang buong kababaang-loob na babatahin para sa kapatawaran ng mga kasalanan ng sangkatauhan.

Pagmunihan natin ang mensaheng ito na naipahiwatig na sa Unang Pagbasa ngayon at binibigyang-diin ni Hesus sa ikalawang bahagi ng Ebanghelyo sa pagsisikap na itama ang makamundong hangarin ng Labindalawa.



PASIMULA



Pambungad

(Ipahahayag lamang kung walang awiting nakahanda.)

Ang daing ko, Poong mahal, lagi mong pinakikinggan, hiling ko'y pinagbibigyan. Kami'y lagi mong titigan nang magkamit-kaligtasan.

Pagbati

P –Pagpalain si Hesus, ang misionero ng Ama! Ang kanyang biyaya at kapayapaan ay sumainyong lahat!

B –At sumaiyo rin!

Pagsisisi

P –Sa pagsisimula nating ipagdiriwang ang mga Banal na Misteryo, alalahanin natin ang ating mga kasalanan, lalo na ang ating di lubusang pagtulong sa pagpapalaganap ng pananampalatayang Katoliko. (Manahimik saglit.)

P –Para sa mga pagkakataong niyakap namin ang mga maling konsepto ukol sa Iyo bilang isang makamundong Mesiyas, Panginoon, kaawaan mo kami!

B –Panginoon, kaawaan mo kami!

P –Para sa mga pagkakataong minaliit namin ang pagwasak na dulot ng kasamaan ng kasalanan sa buhay namin at ng aming pamayanan, Kristo, kaawaan mo kami!

B –Kristo, kaawaan mo kami!

P –Para sa mga pagkakataong inabuso namin ang aming posisyon sa aming pamilya, lipunan o sa Simbahan para sa sariling interes sa halip na makapaglingkod. Panginoon, kaawaan mo kami!

B –Panginoon, kaawaan mo kami!

P –Kaawaan tayo ng makapang-yarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –Amen!

Papuri

B –Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P –Ama naming makapangyarihan, gawin mong lagi naming matapat na sundin ang loob mo upang kami’y wagas na makapaglingkod sa iyo sa pamamagitan ni Hesukristo kasama ng Espiritu Santo magpasawalang hanggan.
B –Amen!

PAGPAPAHAYAG NG SALITA NG DIYOS



Unang Pagbasa Isa 53:10-11

Ang pagwawakas ng ika-apat na “Awit ng Lingkod” ay nagbibigay-diin sa ganap na kalayaan ng kanyang paghahandog sa sarili at sa dalawang bunga ng kanyang sakripisyong kamatayan. Lahat ng ito ay bahagi ng plano ng Diyos para sa kaligtasan ng sangkatauhan.

L –Pagpapahayag mula sa Aklat ni Propeta Isaias


Sinabi ng Panginoon, “Ang kanyang paghihirap ay kalooban ko; inihandog niya ang sarili upang sa pamamagitan noon ay magkaroon ng kapatawaran. Dahil dito’y mabubuhay siya nang matagal, makikita ang lahing susunod sa kanya. At sa pamamagitan niya’y maisasagawa ang aking panukala. Pagkatapos ng pagdurusa, lalapas siya ng ligaya, malalaman niyang hindi nawalan ng kabuluhan ang kanyang pagtititis. Ang aking tapat na lingkod at lubos kong kinalulugdan ang siyang tatanggap sa parusa ng marami, at alang-alang sa kanya sila’y aking patatawarin.”

Ang Salita ng Diyos!
B –Salamat sa Diyos!

Salmong Tugunan Awit 32

B –Poon, pag-asa ka namin, pag-ibig mo’y aming hiling!

R. M. Velez



* Panginoo’y tapat sa kanyang salita, at maaasahan ang kanyang ginawa. Minamahal niya ang gawang

matapat, ang pag-ibig niya sa mundo’y laganap. **B.**

* Ang may takot sa Diyos, at nagtitiwala sa kanyang pag-ibig, ay kinakalinga. Hindi babayaang sila ay mamatay, kahit magtaggutom sila’y binubuhay. **B.**

* Ang ating pag-asa’y nasa Panginoon; siya ang sanggalang natin at katulong. Ipagkaloob mo na aming makamit, O Poon, ang iyong wagas na pag-ibig, yamang ang pag-asa’y sa ‘yo nasasalig! **B.**

Ikalawang Pagbasa Heb 4:14-16

Si Hesukristo ang tanging punong saserdoteng “pumasok sa kalangitan” at lubos na nakauunawa sa atin sapagkat katulad natin siya sa lahat ng bagay, maliban sa pagkakasala.

L – Pagpapahayag mula sa Sulat sa mga Hebreo

Mga kapatid: Magpakatatag tayo sa ating pananampalataya, yamang mayroon tayong dakilang saserdote na pumasok sa kalangitan sa harapan ng Diyos, walang iba kundi si Hesus na Anak ng Diyos. Ang dakilang saserdote nating ito ay nakauunawa sa ating mga kahi-naan sapagkat sa lahat ng paraa’y tinukso siyang tulad natin, ngunit hindi nagkasala. Kaya’t huwag na tayong mag-atubiling lumapit sa trono ng mahabaging Diyos at doo’y kakamtan natin ang habag at kalinga sa panahong kailangan natin ito.

Ang Salita ng Diyos!
B –Salamat sa Diyos!

Aleluya Mc 10:45

B –Aleluya! Aleluya!
Anak ng Tao’y dumating upang sarili’y ihain, Lingkod, Manunubos natin.
Aleluya! Aleluya!

Mabuting Balita Mc 10:35-45

Tulad ng karamihan sa mga Judio ng kanilang panahon, ang mga tanging disipulo man ni Hesus ay umaasa sa isang mapanakop na Mesiyas na muling magtatatag ng kaharian ni David. Nagbunga ito ng di nila pagkaunawa sa misyon ni Hesus at ng dimagandang pangyayaring iniulat sa sipi ng Ewanghelyo ngayon.

P –Ang Mabuting Balita ng Panginoon ayon kay San Marcos

B –Papuri sa iyo, Panginoon!

Noong panahong iyon, lumapit kay Hesus sina Santiago at Juan na mga anak ni Zebedeo, at ang sabi, “Guro, may hihilingin po sana kami sa inyo.” “Ano iyon?” tanong ni Hesus. Sumagot sila, “Sana’y makaupo kami katabi ninyo sa inyong kaharian – isa sa kanan at isa sa kaliwa.” “Hindi ninyo nalalaman ang inyong hinihingi,” sabi ni Hesus sa kanila. “Mababata ba ninyo ang hirap na babatahin ko? Pabibinyag ba kayo sa binyag na daranasin ko?”

“Opo,” tugon nila. Sinabi ni Hesus, “Ang hirap na babatahin ko’y babatahin nga ninyo, at kayo’y bibinyagan sa binyag na daranasin ko. Ngunit wala sa akin ang pagpapasiya kung sino ang mauupo sa aking kanan at sa aking kaliwa. Ang mga luklukang sinasabi ninyo’y para sa mga pinaghandaan.”

Nang marinig ito ng sampung alagad, nagalit sila sa magkapatid. Kaya’t pinalapit sila ni Hesus at sinabi, “Alam ninyo na ang mga itinuturing na pinuno ng mga Hentil ay siyang pinapanginoon, at ang mga dinadakila ay siyang nasusunod. Ngunit hindi ganyan ang dapat umiral sa inyo. Sa halip, ang sinuman sa inyo na ibig maging dakila ay dapat maging lingkod. At sinumang ibig maging pinuno ay dapat maging alipin ng lahat.

Sapagkat ang Anak ng Tao ay naparito, hindi upang paglingkuran kundi upang maglingkod at ibigay ang kanyang buhay sa ikatutubos ng lahat.”

Ang Mabuting Balita ng Panginoon!
B –Pinupuri ka namin, Panginoong Hesukristo!

Homiliya

Sumasampalataya

B –Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit.

Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P–Bilang pagtugon at pagsunod sa paalala ni Hesus ukol sa tunay na halaga ng kanyang misyon, iparating natin sa Kanya ang ating mga abang hiling at sabihin natin:

B–Panginoon, dinggin Mo kami!

* Para sa Simbahang Iyong Katawang Mistiko: Nawa siya ay sumunod sa turo mong buhay kababaang-loob at paglilingkod. Manalangin tayo sa Panginoon!

B.

* Para sa Santo Papa, lahat ng mga lider-espirituwal: Nawa magsikap sila sa pagtataguyod ng synodalidad bilang awentikong paraan ng paggabay sa sambayanan. Manalangin tayo sa Panginoon!

B.

* Para sa mga makapangyarihan sa lipunan sa iba't ibang antas: Nawa maalala nilang lagi na naihalal sila upang maglingkod sa taumbayan at itaguyod ang kabutihan ng lahat. Manalangin tayo sa Panginoon!

B.

* Para sa mga kultura ng lahat ng bayan sa mundo: Nawa pagyamanin nila anumang mabuti at kapuri-puri sa kanila at itakwil lahat ng nakasasama sa ating pagkatao. Manalangin tayo sa Panginoon!

B.

* Para sa atin, sa ating pamilya at mga pamayanan: Nawa lagi nating itaguyod ang dalisay na pagpapahalagang makadaragdag sa paglikha ng sibilisasyon ng pag-ibig at buhay. Manalangin tayo sa Panginoon!

B.

* Tahimik nating ipanalangin ang ating mga pansariling kahilingan. (*Tumigil saglit.*)

Manalangin tayo! **B.**

P–Panginoong Hesus, aming guro at huwaran, bigyan mo kami ng malinaw na pananaw at katatagang sundan ang iyong halimbawa ng paglilingkod sa aming kapwa at bigyang-papuri ang Diyos Ama sa kapangyarihan ng Espiritu Santo. Ikaw na nabubuhay at nangangalaga magpasawalang hanggan.

B–Amen!



P–Manalangin kayo . . .

B–Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P–Ama naming Lumikha, ipagkaloob mong ikaw ay aming kusang mapaglingkuran sa paghahain namin ng mga alay na iyong bigay upang kami'y dalisayin ng iyong pagmamahal sa paglilingkod namin ngayong ginaganap ang banal na pagdiriwang sa pamamagitan ni Hesukristo kasama ng Espiritu Santo magpasawalang hanggan.

B–Amen!

Prepasyo I

P–Ama naming makapangyarihan, tunay ngang marapat na ikaw ay aming pasalamat na pamamagitan ni Hesukristo na aming Panginoon.

Sa dakilang pagtubos niya sa amin ang kasalana't kamatayang aming pasanin ay binalikat niya upang kami'y palayain at maitampok sa iyong luningning. Siya ang nagtanghal sa amin bilang liping hinirang, pari at haring lingkod sa iyong kamahalan. Mula sa kadiliman, kami'y iyong tinawag upang makasapit sa iyong liwanag bilang iyong angkang may tungkuling maglahad ng iyong dakilang pag-ibig sa lahat.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B–Santo, santo, santo . . .

Pagbubunyi

B–Aming ipinahahayag na namatay ang 'yong Anak, nabuhay bilang Mesiyas at magbabalik sa wakas para mahayag sa lahat.



B–Ama namin . . .

P–Hinihiling namin . . .

B–Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B–Kordero ng Diyos . . .

Paanyaya sa Pakikinabang

P–Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B–Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(*Ipahahayag lamang kung walang awiting nakahanda.*)

Ang sa D'yos nagtitiwala ay kanyang kinakalinga sa pag-ibig n'yang dakila nang h'wag magutom na lubha at upang hindi manghina.

Panalangin Pagkapakinabang

P–Ama naming mapagmahal, gawin mong sa aming banal na pakikinabang kami ngayon ay iyong matulungan at mahubog para mamuhay sa kalangitan sa pamamagitan ni Hesukristo kasama ng Espiritu Santo magpasawalang hanggan.

B–Amen!



P–Sumainyo ang Panginoon.

B–At sumaiyo rin!

P–Magsiyuko kayo at ipanalangin ang pagpapala ng Diyos. (*Manahimik saglit.*)

–Nawa ay maiwasan ninyong lagi ang anumang uri ng paghahangad sa kapangyarihan at pag-abuso nito

B–Amen!

P –Nawa ay lagi ninyong isaisip na tayo ay tinawag upang maglingkod at tulungan ang isa't isa gaya ng turo ni Hesus.

B –Amen!

P –Lahat nawa ng inyong mga plano at gawa ay magbunga

ng pagtatayo ng Kaharian ng Diyos dito sa lupa.

B –Amen!

P –At pagpalain nawa kayo ng Makapangyarihang Diyos: Ama, Anak, at Espiritu Santo.

B –Amen!

P –Humayo kayo sa kapayapaan at maging tagapaghatid ng Ebanghelyo sa inyong araw-araw na buhay.

B –Salamat sa Diyos!

TINAWAG AT MASIGASIG NA MAGLILINGKOD TULAD NI KRISTO

Jess P. Balon • Isinalin ni Cecilia G. Valmonte, EdD

Walang dudang tapat ang 12 sa hangaring sumunod kay Hesus. Tulad ng minsang sinabi ni Pedro, “Iniwang namin ang lahat upang sumunod sa kanya.” (Sangguniin Mc 10:28.) Ngunit, sa *isang iglap, nabigo silang lahat na unawaing ang pagsunod kay Hesus ay nangangahulugang pagtahak sa matinik na landas ng pagtanggap sa sarili at buong-kaloobang maglingkod sa lahat, bilang pagtulad sa kanilang Guro.*

Ang buhay ni Kristo ay mailalarawan sa ilang paraan. Isa sa pinakasimple at pinakatotoong paglalarawan ay ang katagang “PAGLILINGKOD.” Buong buhay niya ay “paglilingkod.” Saklaw ng katagang ito ang lahat ng masasabi tungkol sa kanya. *Ang kanyang pagtuturo ay isang paglilingkod* na nagbibigay-liwanag sa mga kaisipan at nagpapaalab sa mga puso ng kanyang mga tagapakinig. Ang kanyang mga *pagpapagaling* ay paglilingkod sa lahat ng mga pinahihirapan sa pagkakaangkin ng diyablo at ng mga pinagdaraanang karamdaman o kapansanan. *Ang pag-aalay ng kanyang sarili sa Kalbaryo bilang biktima ng kabayaran at pakikipagkasundo ang kanyang pinakadakilang uri ng paglilingkod* na pinakikinabangan ng buong sangkatauhan.

Matapos ang ilang naunang kahirapan sa pag-unawa, at sa gabay ng Espiritu, *naunawaan ng lahat ng Apostol ang mabigat na misyong ito* (sangguniin ang unang bahagi ng *Mabuting Balita ngayon*). Pinaglingkuran nilang lahat ang Mabuting Balita at ang Panginoon maging hanggang kamatayan – martir na kamatayan. Si Pablo, ang huling nakasali, ay naglaan ng sarili sa “lahat ng bagay para sa lahat ng tao” nang buong sigasig para sa kanilang kaligtasan.

Ang Simbahan, bilang pamayanan ng mga alagad na nagpapatuloy sa misyon ni Hesus sa taraming siglo, ay dapat na may katangiang tulad ng sa Tagapagtatag at sa Labindalawa – mapagpakumbabang paglilingkod sa lahat;

paglilingkod hanggang kamatayan.

Walang puwang dito ang hindi akma ng pakikipagtagisan sa mga makapangyarihan ng mundo. Kung paano naghari si Kristo sa pamamagitan ng paglilingkod, gayundin dapat ang Simbahan, bilang isang nakapagliligtas na institusyon, ipinatutupad ang kapangyarihang kaloob ng Diyos sa espiritu ng pakumbabang paglilingkod at di-makasariling pamamatnubay. *Ang Simbahan ay nakalaang maging “lingkod ng buong sangkatauhan.”* Siya ay hinirang na maglingkod sa lahat ng tao sa pamamagitan ng mga sakramento at panalangin, sa kanyang paglayo sa mga makalupang kayamanan, at sa pamamagitan ng kanyang pangakong itaguyod ang nakahihigit na mga pagpapahalaga.

Sa gayong pangunahing patutunguhan at pagkilos, dapat na kasangkot ang lahat ng kasapi ng Simbahan, mula sa mga Pinuno hanggang sa pinakabata at pinakamahina nitong kasapi. Tulad ng kung paanong ang bawat Kristiyano ay “isang Kristo,” gayundin, tinatawag ang bawat Kristiyanong maging isang “lingkod” – lingkod ng Diyos at ng lahat ng tao, lalo na ng kanyang kapwa.

Kung gaano katapat sa kabuuan ang Simbahan at bawat mananampalataya ay tapat sa kani-kanilang bokasyong maglingkod tulad ni Kristo, kanilang ipinagkakaloob ang pinakamabisang patotoo sa kanilang pananampalataya. Ang kanilang buhay at presensiya ang siyang kanilang magiging pinakamahalagang handog sa daigdig - handog ng mga Kristiyano sa mundo.

Ang gawaing-misyonero ng Simbahan – ang pagsisikap na ipahayag ang Mabuting Balita sa laha ng tao – *ay isa sa mga pinakamahalagang paglilingkod na kanyang maipagkakaloob.* Sa pamamagitan ng paglilingkod na ito, naipaaabot niya sa sangkatauhan ang matinding pagmamahal ng Diyos sa kanila at makatugon sa pagmamahal na ito sa pamamagitan ng pamumuhay ayon sa turo at halimbawa ni Hesukristo.



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8894-5241; 8475-8945 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, Valmonte, J. Domingo, M. Vibiesca, V. David, R. Molomog, D. Daguio

• Illustrations: A. Sarmiento, B. Cleofe • Marketing: J. Feliciano • Circulation: R. Saldua